

Alles Guddes fir Äre Gebuertsdag, Här Santer !

e Réckbléck op d'Feier zur Geleeënheet vum 80. Gebuertsdag vum Här Jacques Santer, Eierepresident vum der Rollengergrënnescher Musek

E ronne Gebuertsdag, den 8oten, an zënter 15 Joer Eierepresident vum eiser Musek... . Dat ass e gudde Grond fir ze feieren !

D'Rollengergrënnesch Musek huet sech et net huele gelooss, d'Gebuertsdagskand gebierend ze éieren. Aus dësem Grond hu mir den 22. Oktober op e Concert - Anniversaire invitéiert an all Frënn, Famill a Weebegleeder vum Här Santer wéi och Memberen a Sympathisante vum der Musek agelueden, dobäi ze sinn.

No der Begréissung duerch de President vum der Musek, Jos Neuser, an engem klenge musikaleschen Intermezzo, huet den Här Serge Wilmes, Virsetzenden vum der Stater CSV-Sektioun, d'Wuert ergraff fir an enger engagierter a beweegender Ried op d'Etappen an der impressionanter politescher Karriär vum Här Santer zréckzeblécken an dobäi awer och de Mënsch Jacques Santer a säi Mateneen mat de Leit, déi hien ëmginn hunn an ëmginn, gebierend ervirzehiewen.

Hien huet den Här Santer als e Mënsch beschriwwen, deen de Leit gären zur Säit steet wéi och de Stolz, deen d'lëtzebuerger Leit empfonnt hunn, wéi hire Premier „President vum Europa“ ginn ass.

Dobäi huet den Här Wilmes besonnesch d'Manéier, wéi den Här Santer Karriär gemaach huet, positiv betount. En héifleche Mënsch, e Bierger wéi mir alleguerten, bis haut, deen de Standpunkt vertritt, dass Politik vum Mënsch fir de Mënsch ass.

No dëser beweegender Ried huet de Guy Engels, Sous-Chef vum der Harmonie, deen dësen Owend stellvertriedend fir den Dirigent Ivan Boumans d'Leedung vum der Musek iwwerholl huet, den Taktstaf nach eemol erhuewen an et goufen nach zwee Musekswierker presentéiert.

Eent dovun sollt eng besonnesch Iwwerraschung fir den Här Santer sinn ; et war e Marsch, zu Éieren vum Här Santer, am Optrag vum der Musek komponéiert vu kengem aneren wéi eisem Musekschef Ivan Boumans, ënner Decknumm souwuel zum Titel wéi och zum Komponist am Programm annoncéiert.

Leider konnt den Ivan Boumans dësen Owend aus beruffleche Grënn net dobäi sinn. Duerch de musikalesche Kaddo war hien trotzdeem präsent. Dëse gouf stolz vum der Musek presentéiert an d'Partitur uschléissend feierlech un den Här Santer iwwerreicht.

En zweeten, ganz perséinleche Kaddo war e Portrait vum Jacques Santer, dee gemoolt gouf vum der Madame Raymonde Neuser an dem Jubilar vum der Kënschtlerin perséinlech iwwerreicht gouf.

Uschléissend huet den Här Santer selwer d'Wuert ergraff.

Hien huet der Musek Merci gesot an ervirgehuewen, dass d'Musek him et erméiglecht huet, einfach an onkomplizéiert mat de Mënschen a Kontakt ze kommen , wéi hien 1978 an d'Millebaach gezunn ass. Et wier eng Erfahrung, déi hien net mësse wéilt, sou seng Wieder. An sou huet hien, als Successeur vum Här Pierre Werner an der Fonktioun vum Éierepresident vun der Musek, verënnerlecht, dass een virun allem am Veräinsliewen d'Méiglechkeet huet, d'Leit an hir Problemer besser kennenzeléieren.

Ofschléissend seet den Här Santer nach eng Kéier ausdrécklech Merci der Musek, dem President a sengem Komitee, dem Ivan Boumans an alle Frënn, dass si un där ergräifender Feier deelgeholl hunn.

Mat engem Éierewäin offréiert vun der Musek an der Stater Gemeng ass dëse schéinen Owend dunn ausgeklungen.

A wann ee bedenkt, dass d'Musek an enger knapper hallwer Stonn um spéide Sondegowend de Festsall zréck an eng Turnhal, prett fir de nächste Schouldag, verwandelt huet, da brauch een den Zesammenhalt vun eisem Veräin net laang ze erklären 😊!

Nach eng Kéier alles Guddes, Här Santer, wënschen Iech d'Musikanten, de Komitee an d'Amicale vun der Rollengergrënnescher Musek !